

NAZ.
e III

UI

BIBLIOTECA NAZ.
Vittorio Emanuele III

XLII

A

15

NAPOLI

X. LII


a.

15

IUSTI LIPSI 8.
DEFENSIO
POSTVMA.

C. B.

Amico benè merenti
posuit.



ANTVERPIÆ,
EX OFFICINA PLANTINIANA,
Apud Ioannem Moretum.

M. DC. IIX.



REV^{MO} DOMINO
IOANNI MIRÆO
ANTVERPIENSIVM
EPISCOPO.



EDIVI VVM
Tibi, & à capu-
lo iam recētem
LIPSIVM, no-
uum ab institis Lazarum,
fisto PRAESVL AMPLIS-
SIME, illumque ipsum iuris
tui facio : & intimo voto
meo facio. Utinam maius
aliquod, aut speciosius mu-
nus! verum quod poteram
maius, qui illum totum ad

Beneuolentiæ tuę aram sacrarem ! Nec incomitatus ibit : paruulum hunc , & à matris iam iam vberē , manu trahet ; & nomini tuo dicatum ibit. Annam cogita & Samuelem. Robustiorē aliquem tu merebaris ; sed aberant illi longiùs , quàm vt paucis horis euocarem. Malui ergo hunc tenellum , & à matris sinu ludibundum , in promissi æris exsolutionem obsequio tuo sacrare , quàm vacuâ manu pudori meo illudere.

Habe igitur hunc tibi,
PRAESYL AMPLISSIME.

par-

paruulus ludat aulâ: & dum
patrem ore referet, patri
veteris nouæque humani-
tatis tuæ fores reſerabit. Sed
neque hunc alteri, quàm
Tibi; ſeu LIPSI cariffimum
Tibi nomen, ſeu me ſpe-
ctem. Tu enim es, cuius a-
mor in me, & beneuolentia
ſumma. neque in me tan-
tùm: publica & teſtata tua
ſunt in omnes. & Campi-
nia tua loquitur, tot antè
viduata paſtoribus, tot nũc
iifdem diues. Seminarium
in hac vrbe, nobile erudi-
tionis reſoſitorium, operis
tui eſt. ex hoc agro, non

palmites aut frutices , sed
arbores vmbra suâ conten-
tas , & iam doctas pascere,
educis in sterilefcentis illius
foli opimitatem. Iam sacra
si intueamur, quis magis ea
tutatus, ornauit, diuitauit?
quid referam virtutes reli-
quas? simile. Neque ista in
gloriam. Deo ascribis soli:
& amplissimi operis fructū
censes , fecisse. Utinam in
his aliisq; Tibi similes , qui
dignitate similes ! Sed hæc
voti mei sunt. Deus cogi-
tationes omnium ad publi-
ca proferat, vt Patriam con-
siliis, suos vigili curâ tuean-
tur;

tur; & in multorum negle-
ctu aut quiete, vigilem te-
cum manum oculosque ad
clauum porrigant. Non in-
herebo his diutiùs; ne, quod
dici solet, in exiguo corpo-
re ingens vestibulum. Tu,
quod primùm volui, affe-
ctum in hoc conatu meo
vides; in Te, in L I P S I V M.
quem vbi licuit, verbis suis
stiti: quo magis testem hūc,
& velut obsidem vtriusque
in Te animi æternum ha-
beres. Ita voueo

C. B.

A 4

LECTO-

LECTORI MEO.



HABES Lector, quod
amicorum preces, &
meus in magnum LI-
PSIVM affectus protrusit. Nec
potui ordine, & velut pressso pe-
de aduersariorum scriptis insiste-
re. quid enim illi ordine dicunt?
prima, media, vltima ita per-
mista mutuò, ita passim omnia,
ut agrestium spinarum incondi-
tam texturam faciliùs ad princi-
pia sua reuoces, quàm hæc com-
menta. Eadem repetita sæpè: per-
mista non vno loco, non miscenda.
Digeßi tamen in aliquem ordinem
hanc siluam, tum ne eodem cum
aduersariis luto inuoluerer, tum
ut imbellem inimicorum manum
certiùs

*certius videres in hoc retextu.
Ad maledicta, quæ passim pluri-
ma, paria non regessi. Scio, equo
animo audienda esse imperi-
torum conuitia; & ad honesta
vadenti contemnendum esse
istum contemptum. & ubi
attingo, eluo potius hoc lutum,
quàm vt respergam. quin, patior
non semel aspergi. Aristippus præ-
it, qui consputus à Dionysio,
cùm nihil moueretur, & qui-
dam mirarentur; Nempe pi-
scatores; inquit, vt gobium ca-
pian, aquis patiuntur se asper-
gi: & ego, vt balenam, non
patiar sputo madidari? Quid
si ego hanc balenam in suo mari?
& tibi demulceam, quem fuste
antè frangam, quàm pelliciam?*

*Ita faciat eternus Deus. Erant
alia permulta leuia, & quæ nec
nomen mererentur magni LIPSI.*

*& Verò tædium caperet recen-
sendi tam assiduas & ubique
pares nugas. nam, vt Græci,
πάντα μία νόμις. Itaque refellen-
da hæc putavi contemptu solo. Sic
ferè generosior molossus, stolidè
oblatrantem ignauum canem con-
tentus obtrivisse, nullo digna-
tur dente.*

*Omnia
idè pul-
vis.

Scri-

Scriptionis huius occafio.



NON patior abire hunc
scriptorem, inuolutum
nube. rem aperio & re-
tego vniuersam, relectio-
nis gratiam initurus. Fauete qui-
cumque hæc legitis: & mecum cre-
dite, sæcundo hoc somniorum sæcu-
lo, reſerata eſſe omnia archiua ſom-
nialia. Quibusdam terræ voran-
tur: inſula & ſomniatorem ſuum
maria fraudant. Huic quercus lau-
rûſque ferunt

Cruda puerperia; & populos
vmbroſa creabit

Fraxinus, & foetâ viridis puer
excidet orno.

Hic cedes ambulant, & ſanguis nul-
lus: Bacchus alibi, & vinum nuſ-
quam. ibi euigorata concupiſcentiis
iuuentus ſudat, & non vno loco

exan-

eratorio, nec tamen ad plenum co-
dato, aut dissipato per cerebri habi-
tacula, cum adhuc in confusâ vapo-
rali congerie, caput vniuersum oc-
cupat.

Tertius, coluina somniat; qualia
solemus sub extimis noctibus, pro-
ductâ iam per priora somnia som-
niali pinguiore turbatioreq; mate-
riâ; cum exsuccius cerebrũ, neq; na-
tat in liquore, neque furit in turbi-
dâ mistione: Et tamen somnium om-
nia. At quis vetet, licet frustratoriâ
plurimum, vera somniari somnia?
Sanè Stoici Deum volunt somnia
indidisse nobis, peculiare solatium
naturalis oraculi. ita Samonas
propria somnialia oracula apud pa-
rentum monumenta captare, Celtas
olim apud virorum fortium busta
eâdem de causâ abnoctasse legimus.
At somniator hic noster in campis
Elysiis, aut vicino illis nemore, sub
nescio

*nescio cuius Sibyllæ lauro, aduersa-
riarum partium duces vidit:*

Virgineas ne crede manus: hâc
cruda virorum

Prœlia.

*admouit oculos, animûmque curio-
sior. vidit, ceræ commisit: & eadem
nunc dat huius Orbi. Vultis ipsos du-
ces? LIPSIVS & REDANIVS. Ille,
se suâq; clypeo tuetur & hastâ, hac
notâ: Veritas hac vinco. hic ia-
cula mittit, quibus inscripsit: Non
venit à vili sanguine gloria. & ex-
cussêrat iam antè LIPSIVS eâdem
parmâ, inimica non paucorum te-
la, trahebatq; lassam dexteram: vt
nouum tamen aduersarium inau-
diit, diceres nouis animis, nouâ dex-
terâ bella reparare.*

Vt modò connubiistaurus sal-
tuque recepto

Cùm posuit pugnas, alio si fortè
remugit

Bel;

Bellatore nemus, quamquã ora
& colla cruento

Imbre madent, nouus arma pa-
rat, campumque laceffens

Dissimulat gemitus, & vulnera
puluere celat:

*ita noster. & seipso etiam maior,
noua bella parat. paranti aduersa-
rius hastam*

Expulit: illa volans, ceu vis per-
magna moretur

Obuia, vix sonuit clypeo, retrò
visa reuerti;

-- vt præceps cumulo salit vnda
minantes

In scopulos, & fracta redit.

*Risit Athleta noster: nec aduersa-
rium hastâ dignatus, obuiam fortè
sudem per nemora perq; aëra in in-
certum iaculatus, dexteram telum-
que dirigente Fortunâ, hostem stra-
uit, pœnâsque ab inimico sanguine
sumpsit. Erant alij iaculatores Nu-
mida,*

*mida, siluâ tecti; quibus omnis in
pedibus gloria. at nostrum*

—— tædet fugientibus uti,
—— nec facilem dignatur dextra
cruorem.

*quare nec calamo dignos habuit
somniautor noster.*

SYLLABVS CAPITVM.

CAPVT I.

An Lipsius inconstans.

CAPVT II.

An Lipsius à se dissentiens.

CAPVT III.

An contrà, quàm sentit, scribat.

CAPVT IV.

An animum inclinarit cum Fortunâ.

CAPVT V.

An sensus suos de Religione apud
Battauios presserit.

CAPVT VI.

An nomen Christiani in Mariani mu-
tet.

CAPVT VII.

An ingenij dotes submittat Idolo Hal-
lenſi.

CAPVT VIII.

An coactionem in Religione inducat.

CAPVT IX.

An Uſionis & Sectionis auctor.

CAPVT X.

An Lipſius de Fato gentilizet.

CAPVT XI.

An Lipſius Stoicæ ſectæ.

CAPVT XII.

An Oratio Ienæ à Lipſio habitæ.

IUSTI LIPSI
DEFENSIO
POSTVMA.

CAPVT I.

An Lipsius inconstans.

REDANIVS. Magnus ille, apud quem verba factis consonant. Quanta tu de Constantiâ, in omni vitâ inconstantiae exemplum? Adulescens decurris ad nos, deseris senex, & aduersarias partes amplecteris. calidum ibi, hîc frigidum efflas. hunc probas, pòst improbas; nostra sequutus, damnas nostra; & quæ antè tibi cata, stolidâ nunc sunt, & solo risu punienda.

LIPSIUS. Nihil tam probum, quod non vellicare malignitas possit. tu es exemplo : qui res, qui verba, qui correctos cum ætate adolescentiæ lapsus rides ; & illud iuventutis lubricū in aurariâ pendis trutinâ. Quid vis? etiam in illâ ætate sapientiam? & opinionum aut vitæ delectum in inuesti mento? & à quo numquam reflectas? Non est humani ingenij optima semper primis cogitationibus deligere: & ferè secunda in viro consilia maturiora sunt. Hinc vetus illud: Αἱ δ' ὕστεραι φροντίδες σοφώτεραι. *Posteriores cogitationes sapientiores.* Solius alterū Dei est. quem, quia omniscius, ideò expertem erroris habeo : hominum quidquid est, opinantur, vacillant, mutant, errant. *Nemo est mortalium, quem non aliqua pars ignorantie attingat. hanc cogitationem ex ipsâ mortali-*

talitate traximus. nam homo cum errat, humanitas errat. Errorem autem in homine calumniari, est toti ipsi mortalitati conuictiū facere.

Nam vitiis nemo sine nascitur. optimus ille est,

Qui minimis vrgetur. —

Pars etiam vitiis gaudet constanter, & vrget

Propositum: pars multa natat, modò recta capeffens,

Interdum prauis obnoxia. —

pars altera post lapsus surgit valentior, quasi roboris fundamenta sint lapsus: vt admireris hunc fortem, sed non nisi à lapsu fortem. & antè quidem semper varium, nusquam firmum; post lapsum, semper firmū, nusquam varium. Optimus ille est, quem nulla dies vidit labantem: hunc talem, nisi à cælo, non reperies. alter à priore est, quem nulla dies vidit iacentē:

cecidit oriente? non exspectavit
occasum. tertius, qui deteriora
secutus, meliora post probavit.
Quid damnas? in hoc numero
me pono. vis prioribus insidere?
erravi: vis errori inhærere? lapsus
sum: non vis exurgere? Vulnus ac-
cepisti, euolas ad chirurgum: æ-
gritudo molesta est, medicum euo-
cas: & ego, quem imprudentia
luxauit, aut error delumbauit, aut
ignorantia fregit, certiora nec co-
gitem nec sequar? Musto tem-
pus damus ut despumet, & ultro
referamus vasa, reiecticiis viam
ostendentes: & animo, ut iuuen-
tutis & opinionum fæces eiiciat,
nihil damus? Febris præcordia
possidet; quid exspectamus, ut iu-
gulum inhabitet? Imaginor susqui-
dam morbus animum perculit;
quid hæremus? vis illum ægritu-
dinem vniuersam imbibere; adeoq;
hac

hac tingi, ut nullâ pòst arte deco-
loretur? Stomachus noxia hausit,
euomuit, sperare de morbo inci-
pio, nec antè sperare quàm reie-
cerit: animus opiniosam suxit in-
sanitatem, vis in hoc succo ætèr-
nùm indormire?

Et tamen videamus, quæ mea
Inconstantia. Scio quid velis. Res-
publica turbata est; & placidum
illius mare, totq̃ue annorum ma-
lacia; tempestatem passa, qualem
nulla antè. ego eodem turbine e-
iectus in Battauiam vestram, apud
vos vixi; inimicus nemini, amicus
quibus potui, familiaris paucis. Et
erāt rara ingenia, quæ pacem, quæ
quietem amarent: hoc est ingenij
mei perpauca. nam iis, *quibus quies* Sallust.
in seditionibus, in pace turba sunt,
aut qui pro certis & olim partis; Tacin.
noua, ambigua, ancipitia malunt,
numquam hoc latus adiunxi. Vis

B 4 aliqua

aliqua compulit? aberat animus:
& cùm illi aliquando multa de
Republicâ, de Religione, feci
quod Cleomenes Spartæ Rex,
Græculo de fortitudine differenti
aures non præbuit, nec ego men-
tem. feci quod Aristoteles vni ex
his olim, qui cùm multa nugatus
esset, & abiens excusaret, *Num-
quid molestus fui? Non meherculè,*
inquit, nō enim attendi. Nam quid
ego attenderem ad ambitiosos a-
liquot? *qui priuatim degeneres, in
publico exitiosi, nihil præter discor-
dias habent: quiq; honores, quos
quietâ Republicâ desperant, per-
turbatâ consequi se posse arbitran-
tur.* quid ad obæratos è re fami-
liari perditâ? quibus scilicet *affli-
cta fides in pace, quiq; rebus turba-
tis alacres, & per incerta tutissimi.*
quid ad vanos quosdam & ven-
tosos? *qui non tam præmiis pericu-
lorum,*

lorum, quàm ipsis leti periculis? de quibus puta dictum :

Non ita Carpathiæ variant Aquilonibus unda,

*Nec dubio nubes vertitur atra
Noto.*

Atque hi omnes & tales variâ arte imperitos animos impellunt; & trahunt leui momēto leuissimum quemque, & futuri improuidum, aut spe vanâ tumentem, promissi magnitudine. qui si in virum incidunt, maximè ab eruditione instructum, resiliunt trepidi: contra enim hæc audaciæ ingenia, quæ nec in quiete quieta sunt, silentio ille se tuetur. Feci hoc apud vos. in quo quid peccauerim, nescio: nisi peccatum sit diu siluisse. At mihi ille prudens, qui non in vanum spargit monita; qui, quæ scit non profutura, domi suæ tenet, laxaturus habenas, & toto ostio

emissurus, vbi melior spes affulserit. Exspectaui ego tēpus, & nō semel hæc vota mea: O quando! Vt vidi labi etiam in deterius omnia; eripui me aliquando, & libertati reddidi, patriæ, amicis reddidi: tutiora elegi, & meliorem causam; in quâ, si necessum, etiam immorerer.

At magna sperabam, & desertæ causæ præmium. Hoc qui dicit ex illis natatoribus est, qui nusquam pedem figunt. Ego præmium? ô quàm vos semper alieni consilij improbi diuinatores! ego sperarem, qui vltronea & in reluctan-tem sinum hunc munera non semel excussi? ego ambirem, & magnis sæculi cogitationibus imple-rem pectus, post purgandum sæ- uiore pharmaco? ego qui Lunas, qui Albuquerquecos, Paciecos, Con- saluos, Cortesios, qui Cominæos.

nos.

nossem, ætatis nostrę, & frustratorię spei documenta magna? ego qui Styppiotas, qui Apelles, Aratos, qui Seianos, qui Plautianos scirem: Tot magna nomina fluxę potentię, tot felicitatis insignia subito turbine quassata, & euersa eodem, quo tollebantur, momento. Eadem sperarem? aut ambirem dubij successus & ferè ruituri præmia? quasi deessent infidæ Magnorum amicitię exempla, Amani, Parmenionis, Cleandri, Ablauij, Eutropij, Stiliconis, Vineę, Brocę, Luxemburgij, Cabrerę, Caracioli. Et vnus Seneca non erat ad explendum hoc pectus? an opus alio doctore? Huius ego monita expressi, animum velim, & conor. cuius etiam exitus me docuit, & insonuit auribus, quamdiu hæc vïta stetit. Vis ex fide, quid de omni hac aulicâ ac potenti

potenti turbâ sentiam? natant; nec
 vîsquâ pedem in solido figūt. Non
 sum ex his æternùm natatoribus.
 momento ludunt, momento for-
 bentur, & sæpè eodem, quo lu-
 dunt. Nunc superba ostentât car-
 bafa, insurgit malus, & puppis au-
 reis vestita bracteis, omnisq̃. pror-
 fus carina floret polita citro : iam
 aulæa auro grauida, & ipsa latera
 illicibus circumsecus picturis va-
 riegata: nec longa mora; in illo
 ipso sui triumpho sepelitur flucti-
 bus, vt ouasse credas in sepultu-
 ram. ô vana! Quanto feliciùs con-
 tentus paruo securas videt noctes!
 Horatius verè: *Vivitur paruo be-*
nè. & alibi:

*Beatus ille qui præcul negotiis;
 Forumq̃ vitat, & superba ciuium
 Potentiorum limina.*

& ex Ouidij monito :

Vive tibi, quantumq̃ potes, pralu-
stria

*stria vita. causam subiungit:
 Sauum pralustri fulmen ab arce
 venit.*

eamdem habes à Lyrico :

—— *celsæ grauiore casu
 Decidunt turres.*

Felix ergo ille, qui de suo; miser,
 qui de alieno semper viuit. apud
 illum pacata omnia, vt qui nihil
 alienum speret, quare nec timeat,
 (sequitur spem timor:) apud hūc
 nihil compositum, turbata om-
 nia, quia incerta, quia intuta; qua-
 lia sunt, quæ ab alienâ voluntate
 pendent. Alia omnino apud sa-
 pientem vitæ ratio: qui quidquid
 extra animum suum, aut reipsâ,
 aut spe nudâ possidet, non habet
 pro suo; quare nec vitam ad hæc
 componit: solaque illa sua arbi-
 tratur, quæ nulla tyrannis, nulla
 inimica manus potest eripere. Vis
 expressam huius imaginem? Ægy-
 ptum

30 IUSTI LIPSI
ptum cogita. in quâ

*Arida nec pluuio supplicat her-
ba Ioui.*

& vt alter;

*Terra suis contenta bonis, nihil
indiga mercis,*

*Aut Iouis. in solo tanta est fidu-
cia Nilo.*

& Claudianus docto Epigrâmate:
*Aegyptus sine nube ferax, imbrés-
que serenos*

*Sola tenet, securâ poli, non indiga
venti.*

*Gandet aquis, quas ipsa vehit, Ni-
lôque redundat.*

Quæ illi de Ægypto, ego de prur-
dētis pectore: suo viuit, succo suo,
domi suæ nato: auersatur externa;
aut, si quæ necessitas, libat, nec vl-
trâ. O magnum, qui aureo Prin-
cipum flumini nihil debet, qui
nec argenteos imbres, nec stillici-
dia huius aut illius roris auidus
exspe-

exspectet: imò, cui ipsæ adeò opes gratias debent, si admittantur. Ex hoc numero si nō sum, animo tamen sum: & ad hāc prudētiæ arā, priscā pietate & ritu vota nūcupo, vota soluo lubens. Subsīdio mihi hīc natura, quę me ad modestiam fecit, & quietē. neque enim mihi ingenium inclarescēdi per turbas, per togam ciuicā, per principum atria: mihi, Musisq; si viuo meis, sat magnum vitæ meæ fructū retuli. Quod reliquum, dicāt qui vellent benè, dicant malè. nemo efficiet, vt non sim Lipsius, amicissimus & amicorum obseruantissimus, hostibus etiam non aduersus. claudo hoc caput, & finio amici præsago versu:

*Iam tibi quod viuo detraxeris
inuida turba,
Post obitum duplici sænore reddet honos.*

CAPVT II.

An Lipsius à se dissentiens.

REDANIVS. Multa tu hîc more tuo : nec tamen negare potes, partes te aliquando Ordinesque nostros fouisse, collaudasse : nunc tibi aduersæ partes Apollinis cortina : & quidquid Iber dixerit, fecerit, tantum non sanctum. Denique quidquid antè probasti, damnas ; quæ damna- sti, probas. Hæc viri, & viri do- cti sunt?

LIPSIUS. Semper ego sagittis tuis scopus. Iam dixi, & diu est, cum poenitentiam offensæ apud vos contractæ, quanta est, egi ; & publicè testatus sum, nolle factû. idem nunc iterô. Nollem olim dicta, olim quædam probata non pro-

probanda, imò & damnanda. An
nescis* ἰδίον τ' σοφὸν μετενοεῖν; factum
hoc à me.

* Sapiēti
propriū
pœnite-
re?

Confiteor, testere licet, signate

Quirites:

Non est hæc legitima satisfactio?
addo, & offero

* Σπόγγον, ἀνεσπίλω πλᾶζομένης
γεαφίδος.

* Spon-
giam ab-
errantis
quæ me-
dicina
stili est.

Sed meam sortem! vnumquodq;
lanuginis primæ verbum meum
tam validè examinari?

*Nimiùm idem omnes fallimur,
neque est quisquam,*

*Quem non in aliquâ re videre
Suffenum*

*Possis, suus cuique attributus est
error.*

*Sed non videmus manticæ quod
in tergo est.*

Et tamen quid dixi, aut scripsi?
conuitia tātum amoueamus, quæ
tu dolosè mihi adfingis; & spon-
C sione

borauī : neque ego illi place^{re} vo-
 lūi. nam quæ ego scio, non probat
 populus; quæ populus probat, ego
 nescio. Probet proinde improbēt-
 ve, quæ dixi, quæ scripsi, nec ma-
 num mouero. quamquam impro-
 bare malim, vt longissime sim ab
 illius mente, hoc est, minimum
 absim à Sapientis pectore Venio
 propiūs ad accusationis iugulum.
 multa hīc possem, pauca dabo.
 Miraris, quī mors & vita in vno
 ore habitent; vt cui antè proba
 probataque omnia, nunc impro-
 ba damnaticiaque omnia. Velles
 aliquid extortum ē Phariseorum
 scholā : *Licet censum dare Cesari*
an non ? & ; Hæc mulier modò de-
prehensa est in adulterio. In lege
autem Moyses mandauit nobis hu-
iusmodi lapidare. Tu ergo quid di-
cis ? Nihil agis ô bone. Summus
 ille Rex Regum rogandus, vt hoc

miserabili æuo, errantium animos
sanet, aut pertinaciam tollat.

Verùm olim probavi. O quam-
diu hæc ad popularem inuidiam!
Nunc autem sublato omnes ve-
lim. Planissimè. à caluo ad cal-
uum. Vbi hæc dixi, scripsi? Ô
pectus niueum! vbi? *Apud vos fui.*
Fui: & bellicus me turbo in an-
gulum illũ compulit. *Vestra pro-*
bavi. Nolebam. cogor aliquid re-
ponere, & verum aliquando fate-
ri. Mores, studium, finem, media
ad hunc vestra numquam proba-
ui: nec viuit mortaliũ quisquam,
qui hæc ab ore meo. Ciuile hoc
bellum, ferrum, sanguinem, sem-
per improbaui: & naturâ alienior
sum ab hac Erinny. *Sed Iberos, &*
gentem illam totam. Numquam
vniuersam gentem damnaui: &
peccem in omnem prudentiam,
qui totã damnem. Aliquos ex his
minùs

minùs probasse non diffitebor: acres spiritus, & nusquam nisi in periculis credulos: præferuidos, & ex ingenio suo reliquos metientes: alieni roboris & consilij contemptores. hæc numquam probavi. At sunt alia in eâ gente magna: patientia, quâ vnâ ferè regna tenent; fides, qualis in nullâ aliâ; ingenium ad summas scientias, Iurisprudentiam, Philosophiam, Theologiam: & debemus hanc ætate nostrâ illis lauream. Finio: erit alibi latior campus.

CAPVT III.

An contrà, quàm sentit, scribat.

REDANIVS. Contra animi tui sententiam scribis: & fallis sciens, etiam inuitus. Quis te cogit? quis, nisi ille, qui non rectè

eminere dicitur supra omnia humana & diuina, nisi, quidquid est vspiam magnum excelsumque, calcet pedibus; tum deinde tui Iesuitæ?

L I P S I V S. De Pontifice quod dicis, vis credā à cortinā dictum? ô nouum sæculi nostri Paridem! vacuā dominaris in aulā. lactabat ille se olim, & laceſſebat stolidè; vt verò Menelaum vidit,

* Stātem
in prin-
cipibus,
pericul-
sus pe-
ctore ca-
ro est.

* Εν πορμάχοισι φάνεντα, κατεπλήσθη
φίλον ἡττορ.

tibi non idem eueniat, si vel à decem passuum millibus Pontificem intuearis? quem cū nec audias, nec videas, descēdis ad calumniarum tuum campum. Et super quæ diuina. eminet Pontifex? tua? id est Calviniana? Nam de humanis quid stomacharis? calcet ea Pontifex. planè. Quicumq; cælum cogitat,

gitat, & seriò cogitat, non quid-
quid hîc magnû calcat pedibus?

De Iesuitis verò, quid? cogunt
illi Lipsium contra animi sui sen-
tentiam scribere? Et quales tibi Ie-
suitæ? *Hominum genus insolens.*
An ideò mel insuaue, quia ægris
sic videtur? & illi insolentes, quia
vobis aliquot parum sanis? Et quid
si aliquid hausissem ab his fonti-
bus? at aliud quàm tu mentiris.
Aliter, mihi crede, catuli olent,
aliter fues. in illis nil nisi probum,
doctum. plura hîc dicerem, ve-
rà dicerem, plura illosum vetat
pudor. in vobis qualia sint, Ger-
mania, Gallia, Belgium vniuer-
sum, nimis, heu, magna do-
cumenta sunt. quæ ego nec rese-
ro nec narro. O quousque nata-
mus in hoc ciuili sanguine à fer-
ro vestro!

Iam ego qualis tibi videor? quid

tam alienū à meis moribus,quàm aliud sentire ac scribere? ne decrescere quidē didici præter mentem : in laudem tamen, fatebor, semper pronior, in amicitiam facilis : probare pleraque, si abesset improbitas,etiam virtutem in hoste admirari,laudare:etiam eruditionem in aduersario sequi.Hoc si aliud est sentire ac scribere, habes fatentem reum; feci. tu de ingenio tuo iudica. Olim dictum:

Hei mihi difficile est imitari gaudia falsa,

Difficile est tristi fingere mentem iocum.

Nec benè mendaci risus componitur ore,

Nec benè sollicitis ebria verba sonant.

arbitreris de ingenio meo dictum. Non didici gaudia imitari falsa, non ore ridere, mente flere; non hila-

hilarescere vultu, animo dolere. Hoc verò fati mei esse censeo, ab iis morderi, qui cum religione verecundiam exuerunt. nisi fortè, sicut qui ocymum ferunt, felicius id nasci ad conuitia interiecta autumant, ita vos spargendis contumeliis fœcundius mihi nomen paratis. Et ego tamen contra animi mei sensum scribam?

— pultes

Coram alio dictem puero, sed in aure placentas?

non est Stoici, qualem me facis. aut inuitum me quisquam cogat, & meliora scientem, in aliam à sensu meo scriptionem? non est Stoici: non si tundar in mortario: & exertâ hac linguâ, loquentur oculi: hos si quis eruat, singula membra iam linguæ erunt. aut quis hanc dexterâ, refugâ mente, compellet in scriptionem? non si

C s

Mucius

Mucius fiam, & ardeat illa in igne: nam quæ supererit, dextera mihi & sinistra erit. Etiam hac viduabis Lipsium? totum exinde corpus dextera erit, totum scribet, & reteget quod claudebat pectus, Stoicum, vti tu vis; vti ego, Christianum.

-- *Phalaris licet imperet, ut sim
Falsus, & admoto dicet periuria
tauro,*

non decedo à veteri maiorum instituto: nec fallo sacramentum, quo baptismo obstringor. At tu memento moniti:

Arcanum neque tu scrutaueris vllius umquam;

minùs etiam, quæ somniata tibi. neque florem domi tuæ natum alieno adnectas capiti, tamquam capitis huius, non tui somnium; tamquam horti non tui, sed illius palmitem.

CAPVT IV.

*An animum inclinarit cum
Fortunâ.*

REDANIUS. Animum inclinaſti, quò propendere cernebas fortunam: & maluiſti cum Diis adhærere cauſſæ victrici, quâ cum Catone victæ.

LIPSIVS. Priſcus mos rediit, & conuitia ſpargimus è pluſtro. Audiffes Iſocratem; * Τῶν ἄλλοις * Nō eſt iudiciū λοιδόρῃσαι, ὃ σημεῖον ἀρετῆς ἐστίν. & virtutis alioſcō-
temperaſſes ab hac maledicentiâ. uitiiis proſcindere.
Verùm vtcumque ſe res habeat; ſi Diis adhæſi, quid damnas? meliora ſequuntur. ſi non obſtinaui cauſſæ immori cum Catone, quid ringeris? At tu ſatis habes, ſi hanc veterem de Cæſare & Catone gem-

gemmam in medium sparseris,
 quæ mihi algâ est vilior. Et quis
 tibi hîc è tripode ad arculas sedet,
 vt suggerat & dictet ex exciso quo-
 piam codice victricem caussam,
 victamque? neque enim hæc tibi,
 vt pleraque reliqua, sine Theseo.
 Imò quid scabiem reuocas prisca
 temporis? pruritus illi, publicè aut
 priuatim, quem non tenuerunt?
 Quid flammæ iniicis publici in-
 cendiij? non satis artisse semel? sci-
 licet non à radice periissemus, nisi
 nouo calami tui igne arderemus.

—— *abruptis etiamnum flebile
 venis*

*Vulnus hiat, magnæq; patet via
 lubrica plaga:*

& tu mihi partium studia? Fateor;
 stetimus non semel tamquam in
 tenui luto: & obniti (ô homines!)
 conati, cælo terraque pugnanti-
 bus. nimirum nisi Pharsalica, nisi
 Actia-

Actiaca redirēt, salui esse non poteramus. Sed quid ego, plura de grandi hoc profundo? tentandum semper homini, numquam curiosius explorādum. neque enim hīc sola humana manus : fuit diuina, quæ modò habenas strinxit, modò laxauit partium fortunā. Perieratis non semel, nec salus ipsa saluare vos poterat: hostilia interim, in tam præcipiti fortunâ vestrâ, imò in ipso lapsu, consilia labantes tenuerunt. Nec fuit hoc prudentiæ vestræ, aut hostilis fatuitatis: altior aliqua mens ludebat; & pulsus aliorum ventis, fluctus ponebat.

—— *vice cuncta geruntur,*

Alternisq; premunt. ——

Quid facerem? etiam me Aquilo aliquis inuoluerat in partes (nihil nego) & salutem quærebam, & quieta nemora, in quibus tutò, &
sine

sine militari sago , in pacatâ hac
togâ, Musis conuiuerem. quæsiui,
vt qui ignem solent, cùm strictum
est frigus ,

Et prata canis albicant pruinis;
nec reperi. imò dēfiori, & plusquā
Norico frigori implexū me sentij.
& dū terras fugio intutas , ab im-
miti abreptus Oceano, conuolue-
bar fluctibus. Quid sperarem à cy-
tharâ in hoc vorticoso mari cedi-
bus infami ? flecterē irarū minas ?
aut nouus Musicus cantus dulce-
dine, in admirationē, inde in auxi-
liarem manum , raperē tot mon-
stra , quot tegit illud mare ? Del-
phinas habuisset , qui mulcentur
Musicâ , gaudent tiliarum canti-
bus, ac vbicumq; symphonia est,
gregibus aduentāt ; aliquis ex hoc
numero inequitantem Lipsium
reddidisset terris. At procul hinc
Delphini, durum licet genus , sed
quod

quod tamen aquilonio flatu celerius audiat humanas, amicas voces, & dorso Musicum suum vehat. Sequiora portēta alit illud mare. ergo me eripui & cum bono Deo, memet mihi reddidi, patriæ reddidi: nec victricem, victāmve partem, sed causæ æquitatem secutus; & apud quam securè me retererem, id est pectus recluderem, Catholicè, & vt pressius etiā aliquid, Romane à parētibus eductum. Satis, ac nimium etiam diu inter contumacia Battaviæ tuæ vada adhæserat hæc ratis: impegeratque non semel ad rupem illam periclitaturæ salutis. non quòd quidquam illius altiùs insedisset menti; affricuerat tamen aliquid noxij sui succi: vnde illa nata, liberioris opinationis, scriptionis. Vedit Deus, & quam semper colui, Dei mater, longiùsque à statione erran-

errantem scapham diuiniore flatu suo ad tutiora cōpulit. Ita perpetim mitis & benigna Domina nostra est, lapsos erigit, & seruatum it eos ipsos, qui se perdunt. Tu hīc obgannis: ast ego & euentibus omnis æui & exemplo meo nō vno doctus, credo, ab hac vnâ, post illum, omne bonum.

CAPVT V.

*An sensus suos de Religione apud
Battauos presserit.*

REDANIVS. Sensus de Religione tuos intimos, quoad vixisti in Battauis, studiosè pertinaciterque pressisti; memor, & superioris temporis exemplis doctus, quid tibi à feritate Hispanicâ, si quando superior foret, immineret. Nunc nihil est in partibus

bus illis tam vanum, superstitiosum, anile, absurdum, quod non præ te feras, profitearis, laudes, propugnes.

L I P S I V S. Substringe aurem breuiter ac liberè dicturo: si quid non ad gratiam aut gustum tuum erit, sustine & tolera. Pressi apud vos de Religione mentem meam. in quo si silētio peccaui, peccatum fateor. neque hoc silentiū meum, testatione vnâ, vbi tempus fuit, leniui, sed spongiâ deleui: imò pro timore meo vano, meliora maioraq; illi genti reposui. Neque ego aliam personam nunc indui, veterem exui. Semper mihi (ô tu qui vides & scrutaris has fibras!) semper stetit infixæ menti Religio vera, à maioribus tradita. quam & palàm loquimur & profitemur. semper hic sensus, antiquare in Religione, & cum maioribus sa-

D pere:

pere : nec hunc calumnia aut vis
vlla , non dicam exuet nobis , sed
exuret. Neque eo tamen inficias,
non semper palàm professum. quo
bono, aut cui? Semper hoc viden-
dum cui bono , ne sine emolu-
mento Reipublicæ & suo ; imò
ne omnino res eat turbatum , in-
tempestiuâ licentiâ , aut ardore in
fumum abituro. Displicent in Re-
publicâ non pauca , fors & plera-
que omnia; videat an malo reme-
dium reperiât. Non inuenit? sed
nec perimat ægrû corpus, & quod
inualetudine suâ extrema mina-
tur. Prudentis medici est, in de-
speratâ valetudine , non adhibere
desperata medicamina , quæ ple-
rumque tardè gradienti ægro ,
præcipitio consulunt. ergo naturæ
illum relinquit, & suggerit quædâ
in robur & leuamentum , si fors
victrix natura mali, pulsâ quâ op-
prime-

DEFENSIO POSTVMA. SI

primebatur malignitate, reuale-
 scat: aut vt egrum suum paullatim
 robustiori medicabulo paret, dum
 crescunt vires, generosiori medi-
 camini respondentes.

At Lipsius hic tacebat. Ita so-
 leo: nec monita spargere non au-
 dienda. Ego qui sum, qui aduerso
 ferar æstu & ventis? aut qui turba-
 tum iam flumen, turbem etiam
 magis? heus bone, non soleo. Au-
 dire, & vbi res tempusque ferunt,
 monere; hoc soleo: si negant, si
 deest concio, transire, quasi non
 mea, quasi aliena, quasi alterius
 foculi ahenum; alterius cellæ vi-
 num. hoc soleo. hoc meum. hoc
 Lipsij est, eritque cum bono Deo,
 à quo hæc manant, ad quem &
 refero, cum vni illi debeam.

*Verum silui: & repressi intimos
 sensus meos de Religione, quoad a-
 pud Battanos vixi. Factum. nam*

cui retegerẽ, aut quo bono? æuū
& homines ignorare mihi videntur, qui aliud volunt à silentio. & rerum hic status, non viros quærit, qui audire norint & filere? an à scholâ & vmbra adolescentulos, quibus omnis prudẽtia in lingua? Miserum Lipsium, qui in hanc ætatem inciderit, in quâ nihil tam prouidẽ fieri potest, quod non vellicare malignitas consuevit. Ego in eâ Republicâ prudenter de Religione verbum iniicerem, quæ variam in primis & miscellâ Religionem induxit, stabiliendo vt putabat sceptro? ego meam interispargerem, qui vnā, & vnā tantum, in vnâ Republicâ semper probaui? qui rursi Ægyptios Reges? O fatuos! Vnionis auctor Religio vnā; eâ confusâ semper turbæ. ita sensi, nec quidquam muto. tu variā dilaudas, & quæ ex cuiusque

voto fabricata : quia libertatis hîc species. ego hanc à Republicâ repellendam iudico. Vter iustiùs?

Nam quod de libertate inclamas, vbi prudentia tua , si eam in cuiusque delectu ponis? etiam criminum? etiam scelerum? etiam immanium flagitiorum? nam si in his libertatem tollis, & præscindis hunc funem , quid respondebis? Liber homo natus est , & in manu iudicij sui positus : tu quid negas , quod natura illi concessit? Bono illius negas? quid si ille nolit hoc bonum? imò, permitti sibi quod vult velit, tâquam bonum; cùm sibi persuaserit , omnis fastigium boni , in quiduis agendi libertate consistere? Quid respondebis inclamâti ; Quid libertatem adimis, qui non concessisti? naturæ munere hanc accepi: quid inuolas in illius dona? quid conces-

nam violentas potestatem? Tu verò nihil his motus, improbam, & in Reipublicæ perniciem natam libertatem tollis, etiam propositis poenis. quid ergo libertatem concedis in delectu summi Dei? aut quod crimen maius, inuolare in alienas facultates, sanguinem fundere, an de Idololatriâ cenferi? alij Deo cadere, alij supplices manus tollere, alij litare? hoc volo, aliū pro Numine, optimo, maximo habere; verum Numen negare? In Republicâ vestrâ, si magistratus, si Imperatores bellicos publicè designatos, nō admittat priuatus aliquis, aut ē mēte suâ alios deligat quibus pareat; non continuò crux & ignis? & in alterius Dei delectu, nemo vel crinē turbet? Iam quid aliud volunt, qui in fidei rebus, pro suo singuli arbitratu, aliud atque aliud statuunt?

nam

nam ab vno Deo, non nisi doctrina eadē: hanc eademditatem quicumque tollit, & pro illā variā mutuoque pugnantem statuit; varios, necessum, mutuoq; pugnantes, primos summosque pugnantium rerum auctores statuatur. neque enim ab vno Deo, si Deus est, de vnā eademque re, tot aduersantia, inuicemq; se interimentia pronuntiata enasci possunt. Et Deus, si Deus est, verus est, adeoq; ipsa veritas est. at hæc vna est, si veritas est; plura falsitas admittit. Verum quidquid est, non nisi vnum est. Quis ergo paullò prudentior probare illam Rempublicam poterit, quæ plures, id est falsos (nam id consequitur) deos instituit, firmandi sui causā? facit hoc, quicūq; plures Religiones statuit. Vnius enim Dei, cultus vnus, Religio vna, doctrina

vna est. Non mihi ergo talis Respublica, sed tyrannis. nam legitima illa salutem subditorum præcipuum habet, imò vnicū finem. In hoc ergo omnes miscellæ Religionis Respublicas culpo, non modò vt impias, sed etiam vt improuidas. nam quæ hæc securitas ab alienâ turbâ? à dissentientibus in summâ re animis? infirma. Neque ego Rempublicam vllam perennaturam putauerim, vbi in animorum dissidiis aut odiis, ij qui regunt, qui reguntur. partes enim factionesque erunt: & in te hi vel illi insurgent, si tu pronior in hos vel illos exemplo illud Ægyptij docuerūt. & quod regnum magis anceps, variū, imò & cruentum, quàm illud, fuit? historiæ legantur. Expecto quid tu respondeas, & quo acumine hæc expungas. Decurris ad Iulianum? non nego,

negotio, exemplum est, vestro simile. nūquid probum? Ammianus ita narrat: *Vt dispositorum roboraret effectum, dissidentes Christianorum Antistites cum plebe discissâ in palatium intromissos monebat, ut civilibus discordiis consopitis, suæ quisque religionis serviret intrepidus: quod agebat ideò obstinatè, ut dissensiones augente licentiâ, non timeret unanimitatem postea plebem: nullas infestas hominibus bestias, ut sunt sibi feralibus plerisque Christianorum, expertus.* Nota, nota. Duo spectavit. primùm, securitatem suam ab hoc Christianorum diffidio: secundò, exitum ipsum Religionis, quam licentiâ hac secabat, & quasi deducebat in varios doctrinarum riuos, ut ingens illud magni Veri flumen tolleretur. Hæc Iuliani mens, quam Optatus Mileuitanus prævidit, &

aperuit: *Eo modo putans Christianorum nomen posse perire de terris, si unitati Ecclesiæ, de quâ lapsus fuerat, inuideret, & sacrilegas dissensiones liberas esse permetteret.*

Tu hæc si probas, parùm Christianus es; si improbas, parum fānus es, qui inuitaris: vt quid enim hanc lunam in te trahis? Et fide bonâ, quid magis Rempublicam firmat, quàm eorum qui præsunt, qui subsunt, animus vnus? & in vnâ re, summâ re, firma colligatio? Quid verò magis animos colligat, quàm *vnus Deus, vna Fides, vnum Baptisma*? Hic amor non à superficie natus, qui quolibet vento deuerratur; sed ab intimis fibris, quem nemo sine fibris ipsiis euellet. Atque hi tales *solliciti seruare unitatem spiritus in vinculo pacis.* Contrà vbi hæc varia, non ipsi dicunt, qui pro te dicunt, Ægyptij
Reges

Reges & Iulianus? qui palàm fatentur, dissidentes religiones induxisse, vt subditi dissiderent? Tu si potes, aliud ex his euince, & doce pugnantes Religiones inducendas, vt subditi colligantur: nimirum per conciones & lectiones pugnantium doctrinarum: quæ quid sunt nisi flabra atque incitamenta turbarum? doce non esse. doce nõ facilè dissentire in externis, qui in sensu interno, & in salutis ipsâ summâ. Repeto. moue hanc omnis benè institutæ Reipublicę anchorâ, & firma si potes nauem. neque enim fieri potest, vt in tãtâ varietate adeò ex æquo librata sit omnis Religio, vt non vna alteri præualeat. quæcumque talis est, nõ patitur æmulam? quæcumque subiacet, extra metum est? Silet fortè hæc oppressa. resumptura animos, si creuerit. si par
priori,

priori, aut superior, an tacebit?
exempla docent. Heu meum Bel-
gium! orbi ludibrium debes. O
Regnorum ille flos, vt emarcuit
ab hoc vario imbre!

De superstitione quid dicam?
Cicero tibi lumē præfert, ne quid
libero nimis pede vageris: *Religio-
ni parendum est, nec patrius mos
contumaciter repudiandus est.* Et
mihi quidem sedet, pio maiorum
sensu, omnem hunc, qui apud nos
est, cultum è salutis nostræ princi-
pibus defluxisse; etiam actiones,
& quæ circa eas, tempora dico,
modos, ornatum, splendorem fo-
rinsecus, aut in ipsis adytis. Tolle
hæc, quæ tu vno Superstitionis
nomine, refluat omnis exterior
cultus; & cum hoc quidquid est
internæ venerationis. Hinc Deus
ab omni ævo prouidentissimâ cu-
râ prouidit externum ritum: ne
remoto

remoto hoc flabello, omnis cælestis ignis innatus animo, abiret in fauillas. Neque in vnâ Religione hoc tantum: in omni politico corpore eadē videbis. Seca quidquid externū, momento interna ruunt; & iā Regna nulla, Imperia nulla.

Verum aliud olim dixi. O quoties eadem! Augustinus, antè Manichæus quàm noster; Ambrosius antè deorū cultor cum Constantino: & Gallia ante Dionysium, qualis fuit? illius Reges ante Remigium quales? quales ante Seruatium & Maternum Belgæ, ante VVillebrordū Battaui? *Dixi tamen aliud.* Dixerim; & fors etiam scriptis aliud exciderit. non pœnitentiam olim talium ago? atque hæc non satis est ad dicta scriptaque illa omnia vnâ spongiâ eluenda? nec nouum in iuuentutis calore, calida quædam, & tamquam
à musto

à musto spumea euaporari, quæ maturior ætas purget ab omni fæculentiâ. Et quis vestrûm, cuius non aliquod dictum factumque iuventutis primæ, quod pœnitentia pòst correxerit, quod factum dictumve nollet? Ac nescio, an humanum sit numquã labi. Audi eloquẽtiæ flumen: Οὐκ ἔστιν ἀνθρώπων ὄντα, χωρὶς ἐλαττωμάτων εἶναι. *Hominum nemo vitio caret.* Audi Suidam: Μηδὲν ἁμαρτεῖν, ἔστι θεῶν, καὶ πάντα καὶ ὁρθοῦν. *Deorum est, non peccare, & cuncta rectè facere.* Nescio denique an humanum, primæ illius ætatis,

*Dum roseis venit umbra genis,
vultusque recedunt,*

cespitationes obiectare viro. Hac enim ratione, & iuventutis ignorantia, infantia inscitiâ, cunarum balbutiẽ, fasciæ sordes obiectabis viro. quod quã prudẽtiâ, tu iudica.

CAPVT

CAPVT VI.

*An nomen Christiani in
Mariani mutet.*

REDANIVS. Nomen in Ba-
ptismo datum trāscribe Ma-
tri, & auctōribus ducibusq; Iesui-
tis, da te in Sodalitium Hallense:
vt iisdē sacris initiatus dehinc pro
Christiano dicaris mitiore voca-
bulo Marianus; aut, si vis bre-
uius veriusq;

*— unum de medio tollere iota
potes.*

LIPSIVS.

*Bacchum in remotis carmina ru-
pibus*

Vidi docentem (credite posterī)

Nymphasq; discentes, & aureis

Capripedum Satyrorū acutās.

Hos inter auritos Satyros, noster
hic

hic festiuis poëta. At tu quicumque hunc vides;

Fenum habet in cornu, longè fuge, dummodò risum

Excutiat sibi, non hic cuiquam parcat amico.

& mihi fucum hæc faciant? Aliis scurrilitates tuæ, aliis. ego illas credo ab audaci aliquo & malè sagaci ingenio, à temulento derictatas pectore: quas à compotibus propinatas, tam malè stomacho mandaueras, vt necessum fuit regerere. & dum hæc spargis, festiuis admodum tibi videris: at nos risimus camelum saltantem.

O bone. *Omnes videmur nobis sapere, festiui, belli, cùm simus coprea.* An me, an quemquam, cui cerebrum in capite, pudeat ascribi in sodalitium Dei matris? an pudeat vocari Marianum? Qui matris, filij est: qui Marianus, Chri-

Christianus est. Et quod tibi nomen sanctius, Lutheri, Caluini, an Dei matris MARIÆ? quod sodalium, huius an illorum? Æole non est hîc locus tuis flabris: alias terras & maria cogita. Speraueras risum theatro: festiuus de compitis scurra, aut de piscario scammate effrons muliercula. *Lipsius pro Christiano Marianus, aut Maranus.*

Euge tuum, bellè, sed bellè hoc excute totum.

quidnam intus habet? Pulmentum pueri huic graculo. ego quid dabo? dictum vetus:

Qui captat risus hominum, famamq; dicacis,

*Fingere qui non visa potest, —
— hic niger est, hunc tu Romane caueto.*

cuius ego si mores, si vitam spectandam dederò;

*Quàm timeo, victus ne pænis
E exigat*

*exigat Ajax,
Ut male defensus.*

Nolo conuitium conuitio, sordes
fordibus eluere: at ne falsis qui-
de vera reponere. Equidem

*Ut sis tu similis Celi Byrrhique
latronum,*

*Non ego sim Capri neque Sulci:
cur metuas me;*

cur hæc in nil merentem coniicias
probra. Et vis tamen in omni hoc
risu tuo mentem meam? vis ver-
bo? Dei sum. Dei matris sum. imò
quia matris sum, Dei sum: neque
enim matris esse potest, qui non
est filij: nec filij, qui nõ sit matris.

*Huius ero viuus, mortuus huius
ero.*

*Sed tibi, crede mihi, cornua rur-
sus erunt.*

Post omnem hunc cachinnum,
aperi te tantum, nomenq; tuum.
quid erubuisti? aperi. fors in illo
repe-

reperiemus cachinnabilia. aures
 albas, bifidos pedes, cornua, &
 barbulam. retege altum à san-
 guine nomen Arcadiæ matris. A-
 chilles an eius frater es? Hercules
 an Cacus? Quid refugis? palles.
 ita solent qui furti tenentur. Ami-
 cus es? quid amicum vereris mo-
 nitorum auritissimum? Hostis es?
 quin palàm congrederis, si vir es?
 imò si esses, iam frontem osten-
 tasses: nec à decem passuum mil-
 libus, sed cominus, cominus in-
 clamasses:

—— *Ego hanc macharam mihi
 consolari volo,*

*Ne lamentetur, néve animum de-
 spondeat,*

*Quia se iam pridem feriatam ge-
 stitem,*

*Quæ misera gestit fartum facere
 ex hostibus.*

Aude pedem pedi. en me. Quid

quæris oculos, quorum præstringas acies? en me, tantum aude egredere. O virum

Fortem, atque fortunatum, & formâ regiâ

Tum bellatorem,
qui nomen tam enixè tegit suum!
nam ego posthac dicam

*Pyrgopolinice te unum in terrâ
viuere*

*Virtute, & formâ, & factis inuictis-
tissimis.*

qui numquam hostem videris. Interim, ego tibi, quicumque hæc leges, edico fide optimâ:

*Periuriorem hoc homine si quis
viderit,*

*Aut gloriarum plenior, quàm
illic est;*

*Me sibi habeto: ego me illi man-
cupio dabo.*

CAPVT VII.

*An ingenij dotes submittat
Idolo Hallensi.*

REDANIUS. Largissimas ingenij animiq; dotes, largissimâ Dei manu in te collatas, veluti fasces supremi in litteris honoris atque imperij submittis Idolo Hallensî; & talenti tui diuinum munus defodis ad eius aram.

LIPSIVS. Hîc feris, ibi palpas. nimirum: * Ε'κ τ' αὐτ' σώματος βρύει^{* Ex eodem ore} τὸ γλυκὺ καὶ τὸ πικρὸν. O te Ioabum, Abnerum Lipsium! Sed dulce & amarū manat.
hîc cùm tibicinem ad ostium Lipsij canere iussisti, ad Diuam deflectis, in quam defœuias. & quid tibi cum isto axe? quid culici cum elephanto? quid hîc fauos spargis & fella misces? quid rosas, &
E ; inge-

ingenij mei mulsâ, quid litterarios fascēs substernis Idolo? At ego id facio, qui submitto Idolo Hallensi. Cornua tibi esse putabā; nunc mugis, vacca es. Tam stolidâ à te? imò tam fatua ab homine? Nullum mihi Hallis idolum. neque hoc diceres, si ab Apostolo idolum didicisses. Imago ibi Diuæ meæ, Dominæ meæ, cui post Deū, Dei matri, SALVTIS & CLEMENTIÆ non vnâ aram debēo. Ringere: & si voles cum Ischariotâ disrumpere. Ego illi, quidquid in hoc pectore eruditionis, mactō victimam; felix, si admittat. Ego illius pedibus, quidquid hîc ingenij, substerno arenam; beatus, si calcauerit. Ego hæc talenta, diuinum munus, defodio ad illius arā, quæ etiam seruatum it eos ipsos qui se perdunt. Ego eruditionis (fas sit ita loqui) stellas omnes spargam &

& defigam in hoc secundo cæli vertice. Sed & huius Diuæ, Dei Matris, quæ Hallis est, effigiem venerabor. Factum hoc Imperatoribus, quorum imagines in signis, & effigies etiam in castris: atque ad eas exteri ducebantur; & in obsequij signum venerabantur, ac tamquam præsentem adorabant. Tacitus Annalium 15. *Medio tribunal, & tribunal effigiem Neronis sustinebat. ad quam progressus Teridates, cæsis de more victimis, sublatum capite diadema imagini subiicit.* & ego verebor, Diuæ nostræ, Dei Matri, imagines arasque ponere? venerari? non si te tuosque omnes rediuiuos patiar Achitofelos:

*Quales nec statuas imaginésque,
Aere aut marimoribus, coloribúsq;,
Mentor, Praxiteles, Scopas dederunt:*

*Quãtas nec Polycletus ipse finxit,
Nec fit Phidiaco figura calo,*
 tantas, maioresque etiam dabo, si
 non ære, aut perituro marmore,
 calamo hoc, & Lipsiano (abi in-
 uidia) calamo, æternum cum bo-
 no Deo perennaturo. Sed neque
 res mihi magna vlla, sine hoc fi-
 dere, Dei matre: addo nec Chri-
 stianorum vlli. Vt enim Archite-
 ctis opus nullum rectè processerit
 sine libellâ ac lineâ: nõ item mor-
 talibus nobis, sine normâ hac di-
 rectrice.

CAPVT VIII.

*An coactionem in Religione
inducat.*

REDANIVS. Libertatem apud
 nos (nec aliud in ore tuo) eo-
 que nomine Ordines huius asser-
 tores

tores probare & laudare tibi solenne. homines nos esse, ratione non ferro ducendos; liberos nos, ac proinde liberam Religionem, liberum de Deo sensum. nunc ad vnam aliquam arbitraris cogendos. Hanc mentem si repressisses, veniâ dignus eras: nunc cum ad eandem, tamquam face, Principes accendas, quis perferat nisi feruus natus?

L I P S I V S. Hic vnguis in tuo ulcere. Quid inclamas?

*Da spatium tenuémque moram,
malè cuncta ministrat*

Impetus.

tecum habita. te, te ipsum in concilium aduoca, damnabis hunc damnatitium tuum æstum. Et quod tibi tuisque assiduè in ore, Augustinus refellit: *Frustrà dicis, Relinquar libero arbitrio. cur enim non*

Contra
Crescēt.
cap. 31.

E S in

*in homicidiis, & stupris, & quibuscumque aliis facinoribus & flagitiis, libero te arbitrio dimittendum esse proclamas? quæ tamen omnia iustus legibus cõprimi, utilissimum est. Dedit quidem Deus homini liberam voluntatem: sed nec bonam infructuosam, nec malam voluit esse impunitam. Quid si exempla etiam huius coactionis? Nõ Deus ipse Iudæos coëgit sacra & ceremonias suas agnoscere? non igne, serpente, ferro reluctantes coërcuit? & quisquam hîc mihi Deum damnabit? mulcentem volet, non minitatem, non cogentẽ? Quid? vos ipsi quoties hostes iudicastis, qui sacra vestra aut non susceperunt, aut alia delegerunt? quoties capite constantiam luerunt, qui maiorum placitis fortiùs institissent? Notum illud apud vos, *Libertas*. at quis vestrũ eam consecu-*

secutus, Catholicis, id est nobis, verè Christianis, verè Romanis, verè Apostolicis, libertatem aut permisit, aut cùm posset non ademit? aut demum leui verborum compulsionem contentus, intra minas se tenuit? Quoties ignes sensimus, & Decianis sæuiores flagra? Dionysianis truculentiores gemitus? Neronianis immaniores proscriptiones? Leuiāne hæc à Libertate mala? Verùm tu hæc ne attingis quidem: & si quando à nobis auditis, nugas & nebulas verborum offunditis; & dimissā ubique accusatione nostrā, bellorum ciuiliū fortunam opponitis. Et ego nolo nunc hæc tristia; audiamus de re ipsā Ambrosium: *De negotiis ciuilibus si quid statuitur, nemo putat esse violandum; & præceptum de Religione calcabitur? Quid, quòd pœna in ciuiliū denun-*

nuntiationum transgressores : & nulla erit in Fidei imperia temerantes ? maximè cùm nulla res æquè ciuilem ac politicum statum immutet , ac Religionis innouatio : neque ab aliâ re maius periculum imperiis ac sceptris , quàm ab innouatâ religione : magis etiâ ab effusâ quiduis credendi & docendi libertate. Hinc apud omnes gentes coërciti ac puniti religionis nouatores. Nihil hîc de Atheniensibus , Romanis , reliquis dico : Iudæi , qui proximi ad sacra nostra , quàm hîc duri ? nec cohabitationem admittūt cuiusquam à patriâ religione diffidētis. Quid in Ecclesiâ Christianâ veteri ? Licentia effusa numquam fuit , postquam illa Principes habuit Christianos ; imò correctio semper innouatores fuit , aliàs alia , pro tempore scilicet astricta magis aut remissa ,

missa, proque innouatione lenis
aut seuera. Exempla dabo. nota
vetera: & recentia tangunt pro-
pius; nec vlla magis, quam quæ
domi nostræ nata. Quare cum
nulli vobis propinquiores sint,
quam maiores vestri vobis, vos
vobis dabo. Ioannes Matthiæ ^{Anno}
Harlemensis, nouus orbi Enoch, ^{1532.}
quantas Amsterodami turbas de-
dit? Haud dissimiles Ioannes van ^{Anno}
Gheel in eadem ciuitate: arcem ^{1535.}
in eâ, & regni sui sedem habitu-
rus, ni fortiter obuiam itum ef-
set: & stetit hic religionis præ-
textus ciuibus magno sanguine.
Iam Ioannes Leidenfis sartor, ^{Anno}
quam scelestè V Vestphalis impo- ^{1534.}
suit, cum se Israël's iactaret Re-
gem, veteribus promissum, vt e-
riperet suos è diutinâ seruitute?
at nisi potenti exercitu Imperij
Principes, Monasterium noui Im-
perij

Anno
1544.

perij sedem obsedissent, recepissent, ipsumque & assecclas dignis suppliciis affecissent, magnas Europa tota flammis sparsisset, non vno sæculo delendas. Et David Georgius Delfensis, officio vitarius, vibex & macula suæ gentis, qui se Spiritum sanctum cælo missum, & à Filio antè promissum proclamabat, non res semel movit tam fatuo commento? Nec dissimilis fraudis impostor alius Hermannus sutor, qui se apud Frisios cælestem Patrem palam assereret, & Cornelius Int-kerckhof, qui se tanti patris cælo natum filium impudentius an stolidius iactaret, non Rempublicam mouissent, ni occursum tempori foret? Quid Theodorus sartor? ausus est, inauditâ sæculis impudentiâ, se, socios, mulieresque comites, palam ostentare nudos, quòd

Anno
1535.

quòd veritatē negaret tegendam;
 nudam illam esse, aspernari abs-
 condi. nec defuissent qui crede-
 rent, nisi Magistratus prudentiā
 extinctus hic minitabundus ignis
 fuisset. Hæc stolidā hoc æuo.

* Τοῦτο γ' ἔστιν ὑπερβολὴ μαλίας. Ὅ * Illud
verò est
omnis
culmen
infantiæ.
 noctes prudētiores hoc monstro:
 erubescant vel emortuæ lucernæ
 ad tam foedam caninam prolu-
 uiem Henrici Nicolai. non suf-
 funditur homo, non nupta, non
 virgo, ad alienos amplexus: nihil
 hîc intactum, nil sanctum, non
 thorus, non sanguis, non pater,
 mater, soror; prout fors dederit,
 & impudentes tenebræ. Plura ve-
 tat pudor. & hîc tamen quàm
 non semel vniuersam propè Rei-
 publicæ anchoram mouit, ni oc-
 cursum impudentissimæ libidini
 foret. Atque hi omnes, sub pu-
 rioris Euangelij, & à fœce suâ se-
 creti,

retque in sua viscera filios: & armorum honestæ aquilæ, Euangelium; & lapsæ iam ac cum ætate senescentis, aut emortuæ fidei, iuuenatio. O quando serenior nos cælo aura respiciet, & difflabit, quibuscum luctamur, fluctus? neque enim tam acria, tam diuturna bella pugnata legimus pro Religione. Iuuenalis pro mōstro habuit, duo oppida in Ægypto concurrisse inter se ob hanc causam, & id dignum Satyrâ censuit: quid nunc scriberet vbi Europa pænè tota?

— *pariter stabulare bimembres
Centauros, vnâq; ferunt Cyclopes
in Aetnâ*

*Compositos; sunt & rabidis iura
insita monst̃ris*

Insq; suum.

Et nos, infelix Belgium, vnus
Religionis obtentu, tamquam

militari exciti tesserâ , euolamus
auidi in amica olim viscera, in so-
cium sanguinem , in vnus vteri
nexum , orbi fabula & lusus. O
mea Battauia , vbi candor , mo-
rumque simplex suauitas? Decur-
rimus ad arma ; & , audeo dicere,
armorum causas nescimus. Ob-
tenditur *Libertas & Religio*. No-
mina sunt & sparsæ in medium
nuges , irritamenta puerilium dis-
sensionum. Et quis , amabo te,
vos impulit ad innouandam Re-
ligionem ? nescis à nullâ re maius
periculum imperiis & sceptris?
Exempla domestica dedi : at tu,
vt video , externa expectas. Da-
bo. Ægyptius , sub Claudio, non
triginta hominum millia sibi ad-
iunxerat , Hierosolymam regiam
habiturus, ni à Floro Præsidente for-
titer obuiam itum esset ? Haud
dissimile Marici illius factum sub
Vitel-

Vitellio in Galliâ ; Emmanuelis Abrahami dicti in Africâ , quo etiam Marocensium Regem regno & vitâ spoliauit. Apud Turcas , nōne aliquoties res motæ hoc prætextu ? Schacoculis & Calender Zebelis , pluresq̃ ; in illo imperio , nō sat magna innouatæ Religionis documenta ? Quid Germania nostra ? Zuinglio ductore , quot suorum funera vidit religionis obtentu ? cētum millia si dixerō , nihil dixero : ita passim defæuit hæc pestis. Quot Sueuia , & circumiacentes prouinciæ , Thoma Muncero duce ? Iam Misnia , Anne 1525. Morauia , Lusatia , Austria , Silesia , Hungaria , Polonia , Suecia , Dania , Bohemiæ ante omnia regnū , Ziskâ & Procopiis ductoribus (quasi deesset cælum quo rigaretur , quo tamquam vbere lactaretur) quàm triste ostentauit

solum sanguine suorum fœcundatum, vnius religionis prætextu? Cùm sæuissent Orebitæ, Thaboritæ, Orphani; cùm tot sexus omnis myriades terram propè integerent, & sanguinum quædam maria protruderent; non satis hæc ad omnem posteritatem erudiendam; & nouitatis auctores acrioribus etiam pœnis coërcendos? Vt iure hîc concludam Liuiano dicto: *Nihil in speciem fallacius, quàm praua religio, ubi deorum numen prætenditur sceleribus.*

De Libertate; quid dicam? Qualis illa, quæ momento omni pendet ab armatâ militis dexterrâ? adsit modò dux, non deerunt qui sequentur. Vnus aliquis candelam præferat, aderunt exemplò faces & ignes, quibus Respublica, palea & aridum seditio-
num

num lignum , ardeat vniuersa.
 Quæ ergo libertas , in alienâ manu,
 militis manu , & externi militis manu ;
 quem nec sanguis patrius , nec patria pietas ,
 reuocet ab excidio?

Sed iam tibi , ô æterna Sapientia ,
latus, lubens, laudes ago, grates, gratiâsque habeo , quoddam
 te euasi ex illis salebris , & loca
 deueni , per quæ facilior mihi tu-
 tiorque ad te cursus. Hic viuo,
 Deo, patriæ , amicis , mihi ; apud
 veteres Grudios , veteres amicos,
 ac propè ciues. In hoc scientia-
 rum nemore , mecum & cum
 Musis in gratiam redij : & eminus
 specto nubes iam iam ruituras.
 Auerte, qui potes , Deus.

CAPVT IX.

*An vstionis & sectionis
auctor.*

REDANIVS. Homo mitis,
qui lenitatem passim profi-
teris, ac ipso vultu Stoicam quam-
dam lentitudinem, vstiones no-
bis ac sectiones inclamas, Iberici
consilij tesseram.

* Primus
qui oc-
cideris,
excorias

LIPSIUS. * Πρὶν ἐσφαῆθαι, δέ-
ρῃς. Legisti mea? si non, næ tu
insigniter impudens es, qui non
lecta carpis: si legisti, malitia tua
immanis est, appingere quæ nec
cogitata sunt. & tamen hîc, si vî-
pam, triumphas, & inueheris al-
bis equis. Ego quid? teneor, nec
orci me galea teget. nimirum:
In Religionis negotio, in quo liber-

tas cuique ex voto, ille semper clemens, & modestus, cultros & ignes admouet. Quid dicam? aut quæ verborum moderatio effrenes tuos impetus cohibeat? Ut calx aquâ accenditur, ita tu efferaris temperanti omni sermone, neque tamen silentio hîc tueri me debeo. Quid? ego tibi sum ille Cyclops, Phalaris, cui ludo & ioco sanguis humanus? tu homo in hac luce temporum, audes hac sic palàm mentiri? quasi nemo esset, qui mea legisset, aut legeret. Admoue cucurbitas, aut perîsti: neque enim tibi hîc sinciput sanum est. intereà hæc à me habere: Quicumque sedatè meâ legerit, nec sæuitiam nec lenitudinem increpabit: & fatebitur viam præscriptam, quam bono generis humani iniuerint hodie qui regnant. Fatebor tamen, in lenitu-

dinem semper pronior. adeò, si peccandum, in hac parte malim, quàm in aliâ.

Et tamen, *Vre & Sèca*. Num ferrum statim in omnes & ignem? O bone, non, sed pro modo delicti coërceri volo & puniri; patrum in primis exemplo; quando à vanâ Religione turbæ & dissidiorum faces accensæ. In Lucretio non legisti;

—— *quòd sapiùs olim*

*Religio peperit scelerosa atque
impia facta?*

Hæc ubi denata, an non secundum censes? vis parci? vis semper? etiam cum Reipublicæ interitu? Leidæ, Levvardi, Amsterodami, Monasterij, annis 1533. 1534. 1535. voluisses parci, voluisses omnibus? Non tunc plerique rogati quid in viscera sua sæuissent Battavi, responderunt,
non

non fortiùs quàm prudentiùs,

*Neglectis vrenda filix innascitur
agris?*

& tu (aude) damnas Respublicas, quæ has pestes sustulerunt? Voluisses seruasse? quæ hæc clementia est, paucos seruare, vt plurimi pereant. Vera veriùs clementia est, paucos tollere, vt serues plurimos; paucos reprimere in nequitia suæ cursu, ne ad alios malum serpat. Monet Seneca: *Si cogitaueris tecum, remediij causâ quibusdam radi ossa & legi, & extrahi venas, & quadam amputari membra, quæ sine totius perniciæ corporis hæcere non poterant; hoc quoque patieris probari, nullam esse sæuitiam, vt qui viui noluerunt prodesse, morte certè eorum Respublica utatur.* & alibi: *Quadam hastilia detorta, vt corrigamus, adurimus; & adactis cuneis,*

non ut frangamus, sed ut explicemus, elidimus: sic ingenia vitio prava dolore corporis animiq; corrigimus: eoque magis, quò ingenij grauius malum est.

Antè tamen quàm ad hæc extrema, verbis, monitis, præmiis, minis etiam emendatio tentetur; nouissimè ad pœnas, & quidem lento gradu: exemplo medici, qui, vbi frustra molliora cesserunt, *ferit venam; membrisque si adhaerentia nocent, & morbum diffundunt, manus affert: nec vlla dura videtur curatio, cuius salutaris effectus est.* Dura tamen hæc se-

In Scorpiac.

ctio. Respondet Tertullianus: *Horrorem operis fructus excusat. Ululans denique ille & gemens & mugiens inter manus medici, postmodum easdem mercede cumulabit, & artifices optimas predicabit, & seuas iam negabit.* idem faciet

Ref-

Respublica, valetudini, id est tranquillitati, restituta. Graue tamen illi qui patitur. A Tertulliano lenimentum capiat: *Medicinae praesidium plures refugiunt, plures stulti, plures timidi, & malè verecundi. Et est planè quasi saevitia medicina de scalpello, deque cauterio, de sinapis incendio; non tamen secari, inuri, & extendi, morderi què, idcirco malum, quia dolores tibi adfert. nec quia tantummodo contristat recusabitur, sed quia necessario contristat adhibebitur. Quid quod saevior etiam correctio magis pro illis ipsis? Augustinus in hac re: Magis pro eis sunt leges istae, quae illis videntur aduersae, quoniam multi per illas correcti sunt. iterumque: Molestus est medicus furienti phrenetico, & pater indisciplinato filio; ille ligando, hic cadendo, sed ambo diligendo. Si autem*

tem

tem illos negligent, & perire permittant, ista potius mansuetudo falsa, crudelitas est. Hos tales, quicumque in Republicâ es, audi potius, quàm illos de viâ clamorosos, quibus omne cerebrum in linguâ est.

Verùm, *Vre, Seca.* O verba! periissent illa & calami. & tamen, ratione si diiudicamus, quid peccant? A veteris medicinæ ritu sumptus sermo, qui in vlcere aut vulnere secabât, & deinde sistendo sanguini vrebant. Quis veter eadem in animi vlcere? imò cur non magis in hoc? eo quæ acrius, quò huius sanies & malignitas ad plures spectat? Calvinus in Serueto præit exemplo; & vos, antè dixi, non semel. quò miror magis vos de ancillulâ Bruxellæ defossâ debacchari, nec vnum propè librum prodire sine hoc cespite. E-

rat

rat è disciplinatu Nicolai Storck,
 Thomæ Munceri, propiùs etiam
 ex Henrici Nicolai; quem virum
 vos omnibus dignissimum flam-
 mis non semel iudicastis. *Sed mu-*
lier hæc. Non erant mulieres, quas
 Amsterodami morte coërcendas
 Senatus iudicarat? *Sed illa turbas* Anno
nullas dederat. Respondebit pro 1534.
 me Seneca: *Multorum, quia im-*
becilli sunt, latent vitia; non mi-
nùs ausura, cùm illis vires sue pla-
cuerint, quàm illa, quæ iam felici-
tas aperuit. Instrumenta illis ex-
plicanda nequitia desunt. Sic tuto
serpens etiam pestifera tractatur,
dum riget frigore. non desunt tunc
illi venena, sed torpent. Multo-
rum crudelitas & ambitio, & lu-
xuria, ne paria pessimis audeat,
fortune fauore deficiunt. Eadem
velle eos cognosces, da posse quan-
tum volunt. An expectandum pu-
tas,

tas, quoad venena serpens fuderit? Et quem tu in Republicâ magnum virum arbitraris? qui seditionem in semine sustulit; an qui cùm posset, neglexit, nec antè aggressus quàm virili robore suo plenam? Ille sine Reipublicæ periculo, & in solo noxio sanguine scelus piauit; hic non rarò etiam cum Reipublicæ interitu. Neque ille peritissimus nauclerus est, qui nauem cùm coniecisset in breuia, saluam tamen deduxit in portum: sed qui vitauit. Ille si deducit, lacerâ plurimùm, & fatiscentem, suoq; iam oneri succumbentem, non sine vectorû merciumq; metu deducit; hic etiam sine dâni metu. Sed neque ille diligendus est medicus; qui ægrû ad extrema deducit, vt pòst medeatur: sed qui antè prouidâ cautione minitanti morbum necat.

CAPVT X.

An Lipsius de Fato gentilizet.

REDANIVS. O mutationem non excelsi! Ille qui nunc in Hallensi, qui in Sichenensi Diuis, ad superstitionem omnia, qui supplex statuæ, qui Idolo; olim sine Deo, in Fati verba iurat: cuius imperio, se, sua, orbem substernit,

LIPSIVS. Benè sperare de tuo morbo incipio, euomuiſti. Verùm quid hîc lancinas? Fati nomen? Non diffitebor, familiare mihi librisque meis. verùm quid hîc displicet? Age, excute omnia mea scripta (iuuenilia quædã non excuso) an Fatum inuenies à me, alio quã probissimo sensu? nescio. si erit,

si erit, iam nunc rescribo, & deleo. Quid ergo super hoc displicet? nisi quòd nil tibi placet, quod aliis placet. at eò mihi placet magis, quò tibi tuisque placet minùs.

At fatalis illa necessitas, non Gentilitia est? Semper tui similis es, incogitans; intentus & paratus inferre tantum ictum, non vitare. Hic ego antequam altum illud ingredior, præfabor lubens, me labi & errare posse. Res Theologica est; quare Theologis haud inuitus subiicio, qui potiores me isthæc cernere & arbitrari. Ad horum subsellia appello, ad quæ sola veniunt hæ causæ: tu si audes, siste te huic tribunali. Ecce quid sentiam. Numquam ego Fatum volui, immotas quasdam gentilitias causas, quas declinare nemo posset, ob inexpugnabilem quamdam inter se innexionem. quis enim

enim tam infans, non rideat aut illam occantem, aut hanc nentem, aut nescio quam secantem? nimirum in cælestibus nuceta nasci? Quid ergo Fatum? nisi quod Deus præprovidâ cognitione, de quacunque re, in illâ immensitatis suæ prænotione effatus est? hoc mihi Fatum, & verè Fatum, magni Dei effatum. qui ex altitudinis suæ speculâ ventura dispiciens, liberarumq; etiam causarum propensiones, delectusque liberos, non potuit sæculorû ignorare euentus. Hæc scientia Fatum mihi, nec aliud. Scire enim Dei quid aliud, quàm quoddam effari est? nisi malis effatum, scientiam sequi; scientiam verò, futurorum euentum. neque enim sciri potest, nisi præeat aliquid quod sciri possit, ac quasi præiaceat intellectus operationi. Nā in quod

intellectus fertur , & visualitatis
suæ radios mittit , aut re ipsâ iam
esse , aut esse posse necessum est.
Neque hæc aut scientia aut effa-
tum , natas iam aut nascituras res
violentat : non magis , quàm visio
mea sessionem tuam , scriptio-
nem tuam. nec magis necessita-
tem adnectit rebus , quàm astro-
logi cognitio , secuturæ pluviæ. Ita
sentio. tu si quid hîc habes extra
conuitia , extra calumnias & men-
dacia , quibus me oneras , expedi.
Videam aliquando à te veri vm-
bram. nam illa , quibus ad popu-
larem inuidiam omnia reflectis
& torques , & ego , & quotquot
mecum doctiores , rident. Pro qui-
bus quid reponam ? veterem pœ-
nam Rhemniæ legis , frontem in-
uri K. litterâ , Kalumniarum indi-
ce. Vis plura de hoc profundo ?
nec haræ rofas , nec stabulis lilia
spar-

spargo. & si altiùs pedem figo, in tenebris micare me fateor. O mi Sol magne, & salus, sequor ductorem ! tu mihi Phœbus in hac nocte. Et iam video, nec aperio tamen tibi lasciuo & stolido prouocatori. nam quæ ratio aut argutia te vincet, qui cerebrum non in capite, sed in crepidâ circumferre mihi videris; è quâ aliquid humanæ lucis mutueris, si quæ necessitas pupugerit? An tui similis reponeam verba, vt sit quod dicitur Thuscum iurgium? Non soleo. & si illa voles, alium quære; non deerunt è tuâ Battaviâ, aut è vicinâ Germaniâ. Quamquam cordatis hîc eruditionibusq; sat multa: tibi numquam satis. nam, vt ille, frustrâ hanc salpam contundo, numquam exiliet perdix. & plura de grandi hoc abdito

Scire nefas homini: nos tamen

*prauum & debile vulgus
Scrutamur penitus Superos. Hinc
pallor & ira,
Hinc scelus, insidiæq̃, & nulla
modestia voti.*

Lyricus benè monuit:

*—— quid aternis minorem
Consiliis animum fatigas?
Permitte diuis cetera: qui simul
Strauère ventos aquore feruido
Deprælianteis, nec cupressi
Nec veteres agitantur orni.
Quid sit futurum cras, fuge qua-
rere: &
Quem fors dierum cumque dabit,
lucro
Appone.*

CAPVT XI.

An Lipsius Stoicæ sectæ.

REDANIVS. Quòd si planè de tuâ fide & opinione, quâ concepisti de Deo, coniecturam facere ex scriptis & vitâ velimus, propior sîm existimanti, Numen te statuere quidem, & Deum vniuersi conditorem; eundemque æternum Rectorem cû tuis Stoicis credere: ceterùm de Christo haud valdè plùs quàm illos sollicitum esse. & hoc quoque à Stoicis habere, vt accommodes te loci cuiusque legibus.

LIPSIVS. Tu ex coniecturis de mente meâ? O vatem! nescis hanc mentem mare magnum esse, quod scaphulâ tuâ numquam

enauigabis? De scriptis, de vitâ
meâ, quid arguis? Peccaui alibi?
erravi? in viam reducito. At tu
verberas, nec culpam indicas,
quasi ad culpam satis sit verbe-
rasse. Obsecro te, hæc modesti
hominis sunt, impietatis me ar-
guere, quasi sim in gentilium se-
ctâ? Miror magis hanc scribendi
rationem, quàm indignor. Lipsius
tibi philosophatur, & adeò Stoi-
cissat? nec iâ Christianus? Quam-
quam si peccandum est, indul-
gentiùs fors peccauerit, qui Stoi-
cus audiet, quàm qui Luthera-
nus, Calvinista, Mennonista. Et
verò nō auersabor Stoici nomen,
sed Stoici Christiani. Tibi lubens
conuitiatoris, linguæ tuæ calum-
niatricis nomen concessero. De
me verò, quia dicendū est, Deum
testor & homines, post calum-
niam natam, apertiore ac men-
dacio-

daciorē calumniā neminem peti-
tum. Ego Stoicas in omnibus opi-
nationes sequor? quin disertis cla-
risque verbis, non infima illorum
damno & detestor: in quibus ta-
men cum Christianis contesserāt,
sequor, & lubens sequor. In quo
quid peccaui? Numquam putavi
te tam matulam. Intelligis quæ
scripsi? an ut prava quæque inge-
nia, in meis verbis nihil intellexi-
sti, nisi quod ante lectionem ani-
mo tuo parū sano tacitus tecum
formaueras:

—— *procul hinc, procul ite no-
centes;*

Si cui corde nefas tantū.

An quia tu cum Luthero aut
Caluino tuo Christum aut igno-
ras, aut mendacio adeò diminuis,
ut non iam Christus, id est non
Deus, sed sceleratorum maximus,
eoque nomine exquisitissimis in-

ferni tormentis addictus; tu eadem, aut deteriora, si tamen deteriora fingi possint, animo affingas meo? Quisquid tam improbae linguae est, non Iudae

Marsyasq; timet manum & rudentem?

nam quæ mitiora speret?

De Legibus deinde quædam subiungis, quibus me pro conditione loci accommodem. Quid vis? in singulis prouinciis damnare me quæcumque non probo? non soleo. probare singula? neque illud soleo; nec factum à me ullo tempore. Vis ad quamcumq; aduersantem animo meo legem, ad arma decurram? non est instituti mei. Vis verbo saltem tester duplicere? si emendatio speratur, benè mones, & ex mente meâ: sin grauius timetur malû, non transeo in partes tuas. quod qui faciunt,

ciunt, quid aliud sunt quàm dissensionum publicæ tubæ? quàm ciuilis, quo ardemus, ignis sârmenta & fomes? In quam te quoque flammam aliquid occulti ligni suggessisse vt credam, facit tua hæc ad seditionem nata malignitas.

CAPVT XII.

*An Oratio Ienæ à Lipsio
habita.*

REDANIVS. Quid respondebis ad Orationem Ienæ à te habitam, De duplici concordia, Litteraria & Religionis?

LIPSIVS. Non pudet palàm mentiri? Si fatis ad veritatem est, dixisse; fatis sit ad calumniam interimendam, negasse. Et quis in-

G s nocens

nocens iam erit, si dixisse sufficiat?
quis non aliquid meum aut alienum adumbrare potest, & protrudere? hoc si valet, latissimus hic ad calumniam limes; & in quo liberis quadrigis illa inuehatur & exulter. Verum ad rem ipsam. Ego orationis illius parens? Ab alio Ioue venit hic Vulcanus. & cui cerebrum pituita sic obruit, ut vel inspectâ illâ, me & stilum meum non requirat? Pleraque sine Charite & Venere, languida, insulsa, sordentia, absona, quæ norma & Grammatica respuat Latialis: & horum ego sum auctor? Age, ex ipso scripto quid si palàm elicio & efficio me scriptorem non esse? Dictam Ienæ, x x i i x. Iulij anno c i o. i o. l x x i v. vult auctor. Portentum! quod nullus explicet ab Etruriâ aruspex. Ego tunc Ienæ? Quattuor antè mensibus non fui:

fui : quomodo ergo Ienæ dixi ? nisi cum Plautiniano Sosiâ, *Egomet me illic reliqui, & si fortè oblitus fui.* Quid si ipsum Amphitruonem prodo, huius Alcmenæ virum ? huius Palæstræ è Plautinâ Rudente Dæmonē; & ipsius adeò confessionē, huius filiæ patrem ? Quid lates ? imò quin prodis ? quin te certum auctorē tenemus ? Teneo te ab amicâ manu : & palàm edico omnibus : Orationis Ienæ habitæ parens *Melchior Haiminfeldius Goldastus.* Hic ille Pseudolus calumniarū instructor scenæ. hic ille Pandorus, qui malevolentia mantello tectus, sagittas spargit, & vulneri in Lipsio locum quærit. Plura de hoc homine non dicam, dicent alij. qui tamen, si me audient, nihil dicent, nec dignum iudicabunt, in quem nudent dentes. qui cùm laudem sibi quæ-

quæfisset, tamquam à manu meâ;
 & vanitatem ostentauit suam, &
 à me, dictionis suæ infantia, notâ
 omnem auertit. Quis enim, ne si
 conetur, tantas ineptias in tantil-
 lam congerat orationē, tot Ther-
 sites in vnum corpus? O semper
 æmula probis malignitas! quid
 meam scriptionem, vinū meum,
 & vinum (liceat iudicium de me
 aliorū) Falernum, vinum Massi-
 cum, inscitia, imò & malitia tuæ
 diluis aquâ? Ferrem, si puram
 miscuisses: hanc verò purulentam
 & in fæce suâ natantem, quis fe-
 rat? Iam quæ hæc religio est, no-
 men parare nomine meo? imò
 nomen turpare meum luto tuo?
 scilicet

*Vt pueris placeas, & declamatio
 fias.* O quàm

— *miserum est aliena incum-
 bere fame,*

Ne

*Ne collapsa ruani surductis lecta
columnis!*

Factum: subduco nomen meum,
dictionis tuæ columnā: quid nisi
ruant lecta, mentitis inrdificata
columnis? Nec tam miror Gol-
dastum famam captantem, quàm
hunc nescio quem de mendaci
vaginâ ferrum stringentem.

— *Quo nemore umquam
Expiravit aper maioris dentibus
apri?*

*Indica tygris agit rabidâ cum ty-
gride pacem*

*Perpetuam: sauis inter se conue-
nit ursis:*

*Ast homini ferrum letale incu-
de nefandâ*

Produxisse parum est;

armantur de conuitio lingue, non
vno vulnere iugulaturæ; de men-
dacio calami, non vno sanguine
sitiim expleturi; de veneno dex-
teræ,

110 I. LIPSI DEF. POST.
teræ, non vno toxico perempturæ;
& toties perempturæ, quoties
hæc noui lectoris oculos subitura,
Mæotide sæuior ara.

—— *quippe illa nefandi Tau-
rica sacri*

*Inuentrix, homines tantum im-
molat; vltterius nil*

Aut grauius cultro timet hostia.

at hîc dentes, linguas, calamos,
dexteras videbis, toties in mor-
tem repetitas, quoties lectoris no-
ui (ah nimium in fidem faciles)
pauerit oculos.

F I N I S.

APPROBATIO.

Hæc Postuma Iusti Lipsij defensio vtiliter typis mandabitur.

Datum Bruxellæ, die 12. Augusti, anno 1608.

Petrus Vinck, S. Theol. Licentiat^{us}, Censor ordinarius.

SVMMA PRIVILEGII.

ALBERTI ET ISABELLÆ CLARÆ
EVGENIÆ Infantis Hispania-
rum, Archiducum Austriae, Ducum
Burgundiae, &c. Serenissimorum Bel-
gicae Principum, Privilegio cautum
est, nequis *Iusti Lipsij Defensionem*
Postumam, præter voluntatem Ioan-
nis Moreti, Typographi Antuerpien-
sis, excudat, aut alibi excusam in In-
ferioris Germaniæ ditiones importet,
venalemve habeat. Qui secus faxit,
confiscatione librorum & alia graui
pœna mulètabitur, vti latius patet in
litteris datis Bruxellæ x 1 1. Septem-
bris, M. D C. V I I I.

Signat.

N. Lombaerts.

ANTVERPIÆ,
EX OFFICINA PLANTINIANA,
APVD IOANNEM MORETVM.

M. DC. VIII.









BIBI
VI